

前日令刑
曹考略

○御夕講○憲府啓前事不允○壬戌夜雨雹交下狀如大

豆南方有氣如火○御書講侍講官沈彥慶臨文曰此言秦以商鞅為
左庶長定變法之令而書法乃曰書變法罪首變古也大抵祖宗之法
不可紛更故書法如此且刑法輔治之具不可無也然一人以為非則
必變之故有朝更夕變之弊古人云信如四時蓋法度一立則行此之
法當信如四時也近來下不奉法故自 上雖申禁令而無益私行之
禁不為不嚴而聞一邑私行恒留十餘云且朝廷有禁酒之令惡布之
禁而閭閻之間燕飲自恣市肆之中轉販無忌法之不行今日之大弊
也 上曰司馬光謂信者人君之大寶國保於民民保於信立法之時
必須詳審而定之既立之後毋使朝更而夕變然後民信於法矣我國
立法輕易故其變法不難而有下人不信之弊也○憲府啓前事皆不
允○全羅道敬差官趙琛馳啓曰水營吏房鎮撫崔輔義等招內鮑作
千等云每年九月初生倭賊來泊三島劫奪衣糧若伏兵而待之則可
得捕捉水使方好義初二日領兵下海止泊三島留七日以累日空鎮
為未便令輔義及姜順富等為左右隊將而還營聞順富等捕倭之奇
復令兵船到外羅老島所捕賊倭親監斬頭萬無逗留不進之意鎮撫